

宋史新編

宋史新編卷七十七

列傳十九

明南京戶部主事莆田柯維騏著

楊業

子延昭等  
王貴附

判罕儒

從孫嗣

曹光實

從子克明

張暉

司超

楊業太原人父信爲漢麟州刺史業弱冠事劉崇以驍勇聞遷至建雄軍節度使屢立戰功國人號爲無敵太宗征太原孤壘甚危業勸其主繼元降以保生聚帝召見業大喜以爲右領軍衛大將軍師還授鄭州刺史帝以業老於邊事復遷代州兼三交駐泊兵馬都部署擊敗契丹以功遷雲州觀察使仍判鄭州代州雍熙三年

大兵北征以潘美爲都部署命業副之而以刺史王侁  
團練使劉文裕護其軍諸軍連拔雲應寰朔四州會曹  
彬之師不利諸路班師美等歸代州未幾詔遷四州之  
民於內地令美等以所部之兵護之時契丹國母蕭氏  
與其大臣耶律領衆十餘萬復陷寰州業謂美等曰今  
敵兵益盛不可與戰侁沮其議曰但趨鴈門北川中鼓  
行而往文裕亦贊成之業曰此必敗之勢也侁曰君侯  
素號無敵得非有他志乎業曰時有未利徒令殺傷士  
卒而功不立今君責業以不死當爲諸公先將行泣謂  
美曰此行必不利因指陳家谷口曰諸君於此張步兵

強弩爲左右翼以援俟轉戰至此卽夾擊不然無濟類  
矣美卽與仇領麾下兵陣於谷口自寅至巳仇使人登  
托邏臺望之以爲契丹敗走欲爭其功領兵離谷口美  
不能制業敗却走力戰自午至暮果至谷口望見無人  
拊膺大慟再率帳下士力戰身被數十創士卒殆盡業  
猶手刃數十百人馬重傷不能進遂爲契丹所擒其子  
延玉亦沒焉業大息爲姦臣所迫不食三日死帝痛惜  
下詔曰楊業誠堅金石氣激風雲而群帥敗約援兵不  
前獨以孤軍陷於沙漠勁果姦厲有死不回求之古人  
何以加此可贈太尉大同軍節度潘美降三官王仇劉

文裕除名業與士卒同甘苦爲政簡易故士卒樂爲用  
朔州之敗麾下尚百餘人業謂曰汝等各有父母妻子  
與我俱死無益也可走還報天子衆感泣不肯去淄州  
刺史王貴矢盡遂死餘亦死無一生還者聞者皆流涕  
業旣沒朝廷錄其子延朗延浦延訓延瓌延貴延彬  
延昭本名延朗太平興國中補供奉官歷保州緣邊都  
巡檢使就加如京使咸平二年以功拜莫州刺史是冬  
契丹南侵延昭伏銳兵於羊山西北掩擊獲其將進本  
州團練使與保州楊嗣立命帝謂宰相曰嗣及延昭並  
出疎外以忠勇自效忌嫉者衆朕力爲保庇以及於此

五年契丹侵襲軍士多喪失代還將治其罪帝欲收其  
後效宥之六年復用延昭爲都巡檢使又徙寧邊軍部  
署景德中累遷高陽關副都部署延昭不達吏事常遣  
小校周正治訴牒頗爲所罔因緣爲姦帝戒之斥正還  
營卒年五十七延昭智勇善戰所得奉賜悉犒軍未嘗  
問家事出入騎從如小校號令嚴明與士卒同甘苦遇  
敵必身先行陣推功於下故人樂爲用在邊防二十餘  
年契丹憚之目爲楊六郎及卒河朔之人多望柩而泣  
帝差悼錄其三子文廣最顯

文廣字仲容以功授殿直累遷興州防禦使韓琦使築

筆策城文廣聲言城噴珠率衆急趣筆策比暮至其所  
部分已定遲明敵騎大至知不可犯而去文廣遣將襲  
之斬獲甚衆或問其故曰先人有奪人之氣彼若知而  
據之則未可圖也詔書褒諭賜襲衣帶馬遷步軍都虞  
候遼人爭代州地界文廣獻陣圖并取幽燕策未報而  
卒贈同州觀察使

王貴者丹州人廣順初補衛士宋累遷淄州刺史從潘  
美北征頗立戰功及從楊業爲遼兵所圍矢盡張空拳  
又擊殺數人遂遇害年七十二錄其二千

荆罕儒冀州人少無賴爲群盜晉天福中相率詣范陽

委質燕王趙延壽得掌親兵延壽從契丹入汴署罕儒  
密州刺史歷仕漢周累功遷至秦州團練使軍吏著艾  
詣闕請留恭帝詔褒之建隆初改晉州兵馬鈐轄恃勇  
輕敵嘗率騎深入晉境虜獲甚衆是年冬復抵汾州次  
京土原劉鈞遣大將郝貴超襲之途遇害太祖痛惜不  
已錄其子因索不效命者黜王繼勳閻彥進斬部下指  
揮使石進德等二十九人罕儒輕財好施有供奉官張  
奉珪使秦州自言後唐張承業之子罕儒曰我生平聞  
張特進名幸而識其子厚加禮待然好勇善戰不顧勝  
負而及於敗况延福延福孫嗣



嗣初應募爲控鶴卒以功補御龍直太平興國初三遷至天武軍校太宗再征太原嗣自陳願率一隊先登足貫雙箭中手礮折二齒太宗亟召賜袍帶從征幽州補龍猛副指揮使六年從崔彥進兩敗契丹八年李繼遷寇邊從袁繼忠田欽祚戍三义口爲前鋒連敗之又賜袍帶雍熙三年從田重進譚延美率師入契丹境疾戰飛狐口進至城北敵將大鵬翼率衆復至短兵接戰大敗之餘衆屯土嶺復力戰追奔五十餘里數日契丹復致師乘夜復圍直谷石門二砦一日凡五七戰遂引去咸如嗣所料以功補本軍都虞候又從李繼隆禦敵於

北平岩遷本軍都指揮使領澄州刺史至道二年加御  
前忠佐馬步軍頭屯定州契丹復入侵隸范廷召提偏  
師捍於嘉山咸平三年加領本州團練使出爲郎山路  
都巡檢使破敵砦於蒲陰俘獲甚衆五年真拜蔡州團  
練使趙州部署踰年徙滄州後歷號州防禦使邠寧環  
慶副部署卒嗣起行間居方面經百五十餘戰云

曹光實雅州人父疇爲蜀靜南軍使光實嗣職遷永平  
軍節度管內捕盜遊奕使乾德中太祖命王全斌等平  
蜀俄而盜賊群起夷人張忠樂者嘗群行攻劫且憾光  
實殺其徒黨中夜奄至環其居鼓譟並進光實負其母

揮戈突圍以出賊殺其族三百餘口又發冢墓光實詣  
全斌具以事白誓雪冤憤圖雅州地形要害兼陳攻取  
之策全斌壯其志令率兵先導果克其城獲忠樂而甘  
心焉殘寇盡平之遂知黎雅二州兼都巡檢使後全斌  
遣入貢乞罷義軍歸農太祖喜謂左右曰此蜀中傑俊  
也久之以爲黎州刺史又改唐州及平交廣爲嶺南諸  
州都巡檢使太宗就遷本州團練使改汝州李繼捧之  
入朝也以光實爲銀夏綏麟府豐宥州都巡檢使繼捧  
弟繼遷爲邊患光實掩襲俘斬獲繼遷母妻繼遷僅免  
使人給光實曰勢窘不能自存公許我降乎期某日隆

於葭蘆川光實信之且欲專其功不與人謀及期往赴之遂遇害卒年五十五帝驚悼錄其子從子克明

克明字堯卿補衙內都虞候光實戰歿克明時護輜重在後懼軍亂祕不發喪陽令人西來傳光實命還軍銀州而潛與僕張貴入敵中獲光實尸以還葬京師繇是顯名初蜀人留京師者禁不得還鄉里克明以母老間道歸賊陷雅州克明募衆數萬迎王師遂復九縣分兵邀賊復收雅州蜀平擢西頭供奉官以餘寇未息權邛州駐泊巡檢明年潰卒鄧紹等復起攻雅州克明又平之還軍邛州遇賊王珂戰于延貢鎮後又設伏山下以

數十騎與賊接戰克明僞北而所部失期伏不發克明  
挺身走賊追急乃倚大石引弓三發斃三人由是獲免  
入朝改內殿崇班爲溫台等七州都巡檢使景德中蠻  
寇邕州改供備庫副使知邕州代還真宗問南方事對  
稱旨賜一子官遷供備庫使江淮兩浙都大提舉捉賊  
克明使人捕賊輒出私錢資之以故人人盡力視賊中  
趨勇者釋縛使還捕其黨前後獲千餘人知江寧府張  
詠以其事聞賜錢四十萬領平州刺史知辰州撫水蠻  
叛徙宜融桂昭柳象邕欽廉白十州都巡檢使兼安撫  
使既至蠻酋獻藥一器曰溪洞藥壺箭中人以是解之

可不死克明曰何以驗之曰請試以雞犬克明曰當試  
以人乃取藥箭刺脅股而飲以藥卽死群蠻慙懼而去  
未幾知杜州兼管勾溪峒公事始置溪峒司累遷西上  
閣門使歷知登舒邵三州復徙鼎州卒

張暉幽州人後唐累遷奉國弩手都頭歷晉漢周遷至  
耀州刺史宋初從征澤潞事平遷華州團練使在郡有  
治狀太原未下詔入覲問計暉對曰不若戢兵育民俟  
富庶而後爲謀朝廷方議伐蜀遷鳳州團練使兼緣邊  
巡檢壕砦橋道使暉盡得險易因密疏陳之太祖大悅  
乾德二年以暉充西川行營先鋒都指揮使督兵開大

散關路且役且戰人忘其勞未幾卒天禧五年暉妻年百五歲家貧詣闕自陳詔賜束帛錄其孫永德

司超大名人事漢歷宿州西固鎮守禦都指揮使移屯潁州下蔡鎮屢與淮人戰有功周遷至舒州團練使宋初累遷鄭州防禦使其後朝廷將討江左以超父在淮右習知江山險易徙蘄州行至淮西卒

論曰昔晉荀林父不能遏先穀之違命故楚得敗之于邲春秋蔽罪林父以專制之柄在焉王侁剛愎頗類先穀楊業旣知不可與契丹十萬衆爭鋒乃爲侁所激覆軍隕軀誰之咎也荆罕儒曹光實竝貪而輕闇機此世

豈有暴虎馮河能僥倖者乎然三人是當捍城之寄臨  
戎力戰趣刃如歸蓋異夫偷生喪節者而業部將王貴  
及麾下百餘人悉從以沒其有田橫之風哉楊延昭判  
嗣載振家聲張暉司超亦樹有邊績咸足尚云

李進卿

子延渥

楊美

何繼筠

子承矩

李漢超

子守恩

郭進

牛思進附

李謙溥

子允正

姚內斌

董遵誨

賀惟忠

馬仁瑀

李進卿并州人少隸護聖軍晉天福中以戰功擢興順  
軍校周歷內殿直都虞候宋初累功遷至步軍都指揮



使領靜江軍節度卒年五十九贈侍中子延渥延信

延渥以蔭補供奉官歷知平戎寧邊順安軍保州威虜  
軍鈐轄又知冀州徙瀛州景德初契丹大舉擾邊經胡  
盧河踰關南抵城下四面夾攻延渥擊之殺傷甚衆翌  
日契丹急擊發矢如雨延渥分兵拒守益堅契丹遁去  
驛書以聞擢本州團練使通判陸元凱推官李翔錄事  
參軍蔡亨竝進秩又聞城守之際陸元凱流矢中面巡  
檢史普勇敢不避敵復遷元凱屯田員外郎普尚食副  
使普尋卒後延渥徙知邠州歷右領軍衛大將軍領演  
州團練使旣而從其請以左武衛大將軍致仕卒

楊美并州人本名光美避太宗舊名改焉美狀貌雄偉  
武力絕人周鐵騎都指揮使領白州刺史太祖與美有  
舊卽位以爲內殿直都知建隆中升青州北海縣爲軍  
以美爲軍使爲政尚簡易民皆德之數年召還民數百  
詣闕乞留詔諭之不去答爲首者始罷遷馬步軍都頭  
歷保靜軍節度卒年四十八贈侍中美爲人任氣好施  
死之日家無餘財

何繼筠字化龍河南人父福進周節度使繼筠歷棣州  
刺史西北面行營都監宋初升棣州爲團練以繼筠充  
使嘗爲關南兵馬都監又加本州防禦使開寶元年命

將征太原以繼筠爲先鋒部署擒其二將以獻二年親  
征晉陽契丹來援召繼筠至行在授以方略命將精騎  
赴石嶺關拒契丹謂之曰翌日亭午俟卿來奏捷也至  
期帝御北臺以俟見一騎自北來亟遣逆問之乃繼筠  
子承睿來獻捷生擒刺史二人斬首千餘級初并人恃  
契丹爲聲援及是命以所獲首級鎧甲示城下并人喪  
氣拜繼筠建武軍節度判棣州三年來朝詔賜鞍馬戎  
仗令戍邊明年卒年五十一帝謂侍臣曰朕不早授繼  
筠方鎮者慮其數奇耳纔領節制果至淪沒可惜也贈  
侍中繼筠深沉有智略前後備邊二十年與士卒同甘

苦得其死力邊人畏伏多畫像祠之子承矩

承矩字正則幼爲棣州衙內指揮使事太祖太宗以平  
寇功自閒廐副使遷爲使疏害民數十事上之又知河  
南府時調丁男百十輩轉送上供綱承矩以爲橫役奏  
罷其事徙知潭州凡六年囹圄屢空帝嘉獎之入爲六  
宅使端拱元年領潘州刺史命護河陽屯兵時契丹撓  
邊承矩疏請順安砦西貯水爲屯田乃以承矩董其役  
旣成民賴其利語在食貨志淳化中擢西上閤門使知  
滄州踰年徙雄州至道元年契丹夜襲城下承矩整兵  
出拒擒其酋所謂鐵林相公者契丹遁去太宗意其輕

率致寇徒滄州旣而知其功狀進擢加賚之真宗立復遣知雄州咸平二年契丹南侵屢密詔問計嘗詔聽邊民越拒馬河塞北市承矩上言非便卽停前詔三年拜引進使州民詣闕貢馬乞借留詔書嘉獎復遣之承矩上疏謂契丹恃騎戰之利頻年犯塞望恒擇疆吏優以奉祿借以威權然後布政行惠廣安輯之道闢田疇蓄芻粟以備凶年脩器械繕堡戍以防外患則邊城按堵矣又謂齊桓晉文皆募兵以服鄰敵故強國之君必料其民有膽勇者聚爲一卒樂進戰効力以顯忠勇者聚爲一卒能踰高赴遠輕足善鬪者聚爲一卒此三者內

可以決圍外可以屠城古稱良策請試行之又謂權場之設蓋先朝從權立制以惠契丹縱渝信犯盟亦不之廢今因其犯塞尋卽停罷去歲以臣上言於雄州置場賣茶雖貨貨並行而邊氓未有所濟乞延訪大臣議其可否五年詔兼領制置屯田使始建權場或者謂契丹無厭未足誠信徒使公行窺伺會契丹有殺斥候卒者復罷之景德初入朝進領英州團練使真宗謂宰相曰承矩讀書好名以才能自許宜擇善地處之乃出知澶州承矩自守邊以來欲朝廷懷柔爲息兵之計及是車駕按巡本部卒與契丹和益加歡賞明年復知雄州三

年真拜雄州團練使特置緣邊安撫使命承矩爲之且  
詔邊民誘其復業承矩曰契丹聞之必謂誘其部屬也  
乃易詔文爲水旱流民之意樞密以爲擅請罪承矩帝  
釋不問承矩善推步自知冥數乃以老疾求僻郡授齊  
州團練使至郡七日卒年六十一特贈相州觀察使錄  
其四子邊民聞其卒相率詣雄州發哀飯僧云

李漢超雲中人周殿前都虞候宋累遷齊州防禦使兼  
關南兵馬都監關南人有訟漢超強取其女爲妾及貸  
而不償者太祖召而問之曰汝女可適何人曰農家也  
又問漢超未至關南契丹如何曰歲苦侵暴曰今復爾

耶曰不太祖曰漢超朕之貴臣也爲其妾不猶愈於農婦乎使漢超不守關南尚能保汝家之所有乎責而遣之密諭漢超曰亟還其女并所貸朕姑貰汝勿復爲也不足於用何不以告朕耶漢超感泣誓以死報在郡十七年吏民愛之詣闕求立碑頌德太祖詔徐鉉撰文賜之旣與馬仁瑀交惡太祖賜金帛令和解焉太宗遷應州觀察使判齊州仍爲關南巡檢卒軍中皆流涕贈太尉忠武軍節度子守恩

守恩少驍果善戰有父風累官至隴州刺史知靈州與轉運使陳緯部芻糧過瀚海爲賊所邀守恩及子象之



望之弟守忠皆沒真宗震悼特贈守恩洪州觀察使

郭進博野人少貧賤爲傭保有膂力個儻任氣結豪俠嗜酒蒲博其家少年患之欲圖殺進婦竺氏陰知其謀進遂走晉陽依漢祖累遷乾坊二州刺史少帝改磁州周廣順初遷登州刺史會群盜攻劫率兵平之民吏詣闕請立屏盜碑許之顯德初移衛州亡命者出沒椎剽設計發摘剪滅無餘郡民又請立碑記其事改洛州團練使有善政郡民復詣闕請立碑頌德詔左拾遺鄭起撰文賜之進嘗於城四面植柳壕中種荷芰蒲葦後益繁茂郡民見之有垂涕者曰此郭公所種也建隆初遷

本州防禦使充西山巡檢嘗與曹彬王全斌入太原境  
獲數千人開寶中親征河東爲行營前軍馬軍都指揮  
使後又征河東爲河東道忻代等州行營馬步軍都監  
招徠山後諸州民三萬七千餘口太平興國初領雲州  
觀察使判邢州仍兼西山巡檢四年車駕將征太原命  
進爲都部署以防北邊契丹果犯關進大破之自是并  
人喪氣時田欽祚護軍恣爲姦利進力不能禁屢形於  
言進性剛烈戰功高欽祚以他事侵之心不能甘自經  
死年五十八欽祚以暴卒聞贈安國軍節度後頗聞其  
事罷欽祚內職爲房州團練使進性喜殺士卒小違令

必寘於死御婢僕亦然在西山日太祖遣戍卒必諭之  
曰汝輩謹奉法我猶貸汝郭進殺汝矣然能以權道任  
人嘗有軍校自西山詣闕誣進者太祖詰知其情狀送  
與進令殺之會弁人入寇進謂誣者曰汝能立功卽薦  
汝於朝其人踴躍聽命果致克捷進卽以聞乞遷其職  
太祖從之初太祖令有司造宅賜進悉用甬瓦有司言  
舊制非親王公主之第不可用帝怒曰進控扼西山十  
餘年使我無北顧憂我視進豈減兒女耶

牛思進者祁州人少從軍以膂力聞嘗取強弓絰於耳  
以手引之令滿又負墻立力士二人撮其乳曳之疑不

動軍中咸異之郭進卒命思進代之師還以功改本州團練使授右千牛衛上將軍致仕卒

李謙溥字德明并州人性慷慨重然諾通左氏春秋歷仕晉漢周以戰功遷至澶州巡檢使丹州刺史乾德元年移慈州兼晉隰緣邊都巡檢行石州事未幾移隰州刺史開寶元年命李繼勳等征太原以謙溥爲汾州路都監太祖征晉陽爲東砦都監前軍副部署謙溥在州十年敵人不取犯境有招收將劉進者勇力絕人謙溥撫之厚藉其死力往來境上以少擊衆并人患之爲蠟丸書以間進得書道中晉帥趙贊得之以聞太祖令

械進送關下謙溥謂進曰我以舉宗四十口保汝矣卽  
上言進爲人所惡此乃反間也帝悟遽令釋之三年  
召謙溥爲濟州團練使後邊將矢律復爲晉隰緣邊巡  
檢使邊民間之爭相迎勞於道左六年領兵入太原連  
拔七砦八年以疾求歸京師卒年六十二謙溥與宣祖  
同里閭弟謙昇與太祖爲布衣交其母閭嘗厚待太祖  
及卽位數迎入宮中命坐飲食話及舊故賜賚優厚雍  
熙中太宗爲許王納謙昇女爲夫人以謙昇爲如京副  
使謙溥子允則允正

允正字脩已以蔭初歷閤門通事舍人時女弟適許王

因質其居第太宗謂曰爾父守邊二十餘年止有此第  
卽遣內侍輦錢爲贖指紳咸賦詩頌美累功遷至東上  
閣門使歷知鎮莫二州又爲并代馬步軍鈐轄咸平五  
年合涇原儀渭邠寧環慶路爲一界驛召允正爲鈐轄  
兼安撫都監又命同錢若水詣沿邊諸砦經度邊事加  
領誠州刺史改客省使知定州兼鎮定都鈐轄大中祥  
符中歷鄜延部署領河州團練使徙知永興軍卒允正  
頗知書生嚴毅疎財喜自脩飭素病痾僕以是罕在要  
近累典邊任多殺戮云

姚內斌盧龍人仕契丹爲關西巡檢瓦橋關使太祖從

世宗北征內斌以城降授汝州刺史宋初歷慶州刺史在郡十數年西夏不敢犯塞號爲姚大蟲言其武猛也卒年六十四本名犯宣祖諱改今名云

董遵誨范陽人父宗本爲漢隨州刺史遵誨署隨州牙校周錄其前後功遷至驍武指揮使太祖微時客遊至漢東依宗本遵誨憑藉父勢太祖每避之遵誨嘗謂太祖曰每見城上紫雲如蓋又夢遇黑蛇長百尺餘俄化龍東北去雷電隨之是何祥也太祖皆不對他日論兵戰事遵誨理多屈拂衣而起太祖迺辭去自是紫雲漸散及卽位召見遵誨伏地請死因諭之曰卿尚記往日

紫雲及化龍之夢乎遵誨再拜呼萬歲俄而部下訴其  
不法太祖釋不問召諭之曰朕方赦過賞功豈念舊惡  
耶遵誨母在幽州太祖令人賂邊民竊迎其母送與遵  
誨遵誨遣外弟劉綜貢馬以謝太祖解所服真珠盤龍  
衣命齎賜之綜曰遵誨人臣豈敢當此太祖曰吾方委  
以方面不此嫌也旣而命從慕容延釗討李筠遷馬軍  
都軍頭再遷爲散員都虞候開寶元年以西夏近邊授  
通遠軍使恩威並行夷落以定太祖嘉其功就拜羅州  
刺史太宗卽位兼領靈州路巡檢遵誨不知書豁達無  
崖岸多方略能挽強命中在通遠十四年夏人悅服秋



毫不敢犯卒年五十六帝軫悼錄其子

賀惟忠定襄人少勇敢善騎射周授儀鸞副使令知易州捍邊有功尋遷正使開寶中太祖駐常山以爲本州刺史兼易定祁等州都巡檢使嘗中流矢金瘡發而卒錄其子昭度惟忠性剛果知書曉兵法有方略在易州繕完亭障撫士卒得其死力威名震北邊故十餘年間契丹不敢南牧

馬仁瑀大名人士餘歲時鄉校習孝經旬餘不識一字博士咎之仁瑀夜中徇往焚學堂博士僅以身免常集里中群兒數十人與之戲爲行陣之狀自稱將軍日與

之約鞭其後期者羣兒皆畏伏又市果均給之益相親  
附及長善射挽弓二百斤周補內殿直會劉崇入寇世  
宗親征周師不利諸將多引退仁瑀謂衆曰主辱臣死  
安用我輩乃控弦躍馬挺身出陣射賊大軍乘之崇遂  
敗績諸將坐失律誅者七十餘人擢仁瑀爲弓箭控鶴  
直指揮使至內殿直都虞候恭帝嗣位詔從太祖北伐  
太祖受禪以佐命功授散員都指揮使領貴州刺史累  
擢至岳州防禦使移領漢州初詔仁瑀等領荆湖諸郡  
不數歲復其地至是將征蜀又詔領川峽諸郡遂平之  
先是薛居正知貢舉仁瑀私囑所與者榜出無其人聞

喜宴日仁瑀酒酣攜所囑者詣居正切責之爲御史中丞劉溫叟所劾帝優容之王繼勳以后族驕恣凌蔑將帥人皆引避獨仁瑀詞氣不相下會帝將講武郊外遂欲相圖各勒所部兵私市白挺帝密知之詔罷講武出仁瑀爲密州防禦使羣盜起兗州賊首周弼毛襲甚勇悍材貌奇偉弼號曰長脚龍監軍討捕數不利詔仁瑀掩擊擒弼盡獲其黨開寶四年遷瀛州防禦使兄子嘗因醉誤殺平民民家自言非有宿憾願以過失殺傷論仁瑀曰我爲長吏而兄子殺人此怙勢爾非過失也豈敢以私親亂國法哉遂論如律太宗遷至朔州觀察使

判瀛州事卒年五十贈河西軍節度

論曰宋初群雄爭衡二虜時爲邊患故常注意謀帥命何繼筠領棣州李漢超屯關南賀惟忠守易州馬仁瑀守瀛州以拒契丹不但常山之韓令坤而已又命郭進控西山李謙溥守隰州以禦太原不但晉州之武守琪昭義之李繼勳而已又命姚內斌守慶州董遵誨屯環州以備西夏不但延州之趙贊原州之王彥昇靈武之馮繼業而已郡中筦權之利悉以畀之恣往來貿易不復征許其召募爪牙軍事得便宜入朝必召對賜坐豐宴賚有細過置不問而厚撫族屬在京師者彼匪特偷

恩圖報且富貴能養士爲間謀折衝應變動罔掣肘故  
二十年間無西北之憂而西蜀荆湖嶺表江南諸國咸  
破竹舉之謂非御將有要術哉李進卿楊美亦累戰功  
而美居北海務在安輯誠得武之善經孰謂開國之武  
功不競耶

宋史新編卷七十八

列傳二十

明南京戶部主事莆田柯維騏著

王贊

張保續

盧懷忠

王繼勳

侯贊

翟守素

王文寶  
劉審瓊

趙玘丁德裕張延迪梁迥  
史珪田敏祐王惟附

王贊澶州人起小吏歷武階周世宗累遷右驍衛將軍  
三司副使時張美爲使世宗聞京城衛兵歲廩幾何美  
不能對贊代奏甚悉美伺之及征關南言於世宗以爲  
客省使領河北諸州計度使所至發摘姦伏一矯姑息  
之弊邊臣頗切齒師還復舊職太祖平奎重進知贊材

可委以完葺令知揚州旣行舟覆閭橋下溺死上嗟悼  
謂左右曰溺吾樞密使矣蓋將大用也賻其家

張保續字嗣光京兆人以父洪蔭登仕歷五代遷至客  
省使宋初遷衛尉卿判四方館客省閣門事保續性介  
直好儉素在閣門前後四十年善宣贊辭令聽者傾聳  
累使藩國不辱命更六朝未嘗有過卒年六十四

盧懷忠河間人漢乾祐初補供奉官顯德初遷如京副  
使宋遷內酒坊副使會朗州軍亂太祖將致討遣懷忠  
使荆南還奏曰觀其形勢蓋日不暇給太祖召宰相巨  
江陵四分五裂之國今出師湖南假道荆渚因而下之

萬全策也卽以懷忠爲前軍步軍都監荊湖平以功遷爲使終客省使

王繼勳陝州人隸河中府爲牙校李守貞之叛繼勳出降補供奉官周歷憲麟石砭四州刺史宋初歷道州刺史州境接廣南劉鋹屢引兵入寇繼勳因上言嶺表可圖狀及王師南伐以爲賀州道行營馬步軍都監繼勳有武勇在陣常用鐵鞭鐵槊鐵櫓軍中目爲王三鐵

侯贊太原人在漢以父義陰補官至周爲供奉江南復命領三門集津發運使宋初爲諸衛將軍先是朝廷歲仰給關中穀麥贊掌其事三十年國用無闕遷至右武



衛將軍後知建安軍楊徐二州皆有善政太宗累遷右衛大將軍知靈州得邊士心遷左衛在朔方凡十餘年求可代者難其人卒于官贈左衛上將軍

翟守素任城人以父溥任爲殿直歷漢周遷供奉官領承天軍使乾德中爲引進副使從王全斌伐蜀擢判四方館以兩川餘寇未殄再令入蜀經略諸郡開寶中從征太原轉引進使又命爲劔南十州都巡檢使太宗卽位遷客省使領憲州刺史錢俶獻浙右地詔守素爲兵馬都監安撫諸郡人心甚悅卽以知杭州歲滿爲西京巡檢使又權知河南府兼留守司事遷商州團練使雍

熙中歷知鳳翔府淳化中徙石州以老病上疏求歸本  
郡從之卒年七十一守素逮事四朝歷內職五十餘  
年性謹厚寬容所至有治績新進後生多至節帥而守  
素又次不遷殊無隕穫意特論多之

王文寶陽武人以任子補殿直累遷判四方館事文寶  
歷內職三十年雅好言外事太祖太宗頗信任之中外  
咸畏其口出爲高陽關兵馬鈐轄卒于官

劉審瓊范陽人太祖節鎮給事左右及受禪遷至軍器  
庫使會樞密使李崇矩門人鄭伸擊登聞鼓誣告崇矩  
受太原席義叟黃金私結翰林學士扈蒙以甲科私義

叟引審瓊爲證上怒召審瓊詰問審瓊具言誣枉得解  
遂出知鎮州太宗之征河東也駐蹕月餘儲侍無闕遷  
領澶州刺史知潭州徙河陽後授坊州刺史卒審瓊雅  
善酒令博鞠年八十餘筋力不衰孫爽進士及第

趙玘澶州人在晉納粟助邊補集賢小史歷秦成階等  
州觀察判官周顯德初以城歸朝授郢州刺史歷汝密  
澤三州宋初歷左監門衛大將軍判三司玘狂躁倖直  
多忤上旨頗優容之嘗潛奏宰相趙普私市秦隴大木  
事懼普知因稱足疾求解職踰年罷使守本官自是累  
獻密疏皆留中常疑普中傷詣闕納所授告命詔勒歸

私第又請退居鄆州不許玘不勝忿踰年伺普入朝馬  
前揚言其短上聞之召玘及普面質其事玘大言詆普  
貶木規利上怒促令集百官逐普王溥等奏玘誣罔乃  
詰責玘命武士撾之黜爲汝州牙校卒

李德裕洺州人在周以父審琦蔭補供奉官宋遷至內  
客省使時蜀初平寇大起用爲西川都巡檢使與張延  
通等率師討之盡平其黨歸朝陷延通棄市事在延通  
傳又奏轉運使李鉉嘗醉酒言涉指斥上怒驛召鉉下  
御史案之鉉言德裕在蜀日屢以事請求多拒之皆有  
狀御史以聞太祖悟止坐鉉酒失左授未幾德裕亦出

知潞州歷常潤等州經略巡檢使德裕以傾險爲衆所惡時勢剛狠不恤士卒黷貨無厭越人苦之錢俶奏其事貶房州刺史卒

張延通潞城人周時以父彥成蔭補官宋歷東上閣門副使開寶中爲西川兵馬都監同丁德裕王班及內臣張嶼討蜀寇德裕頗專恣延通面質其短又與嶼不協延通亦爲解之德裕疑與嶼爲黨益不悅會嶼先歸闕賜予甚厚延通德裕繼至則召延通顧問待德裕稍薄德裕疑懼誣奏延通嘗對衆言涉指斥且多不法事指嶼爲黨太祖怒卽收鞫引問延通挖對不遜遂斬之

梁迴聊城人在周爲左藏庫使宋初屢有征討之事以  
功遷至東上閣門使開寶五年命爲廣南道兵馬都監  
兼諸州巡檢八年奉使江南迴素貪冒外務矯飾初若  
嚴毅不可犯雖饋食亦不受江南人頗憚之旣而奉以  
賈貨殆直數萬緡迴卽大喜過望登舟縱酒繼日宴樂  
及歸戀戀不發人多笑之江南平領順州團練使太宗  
歷授唐州防禦使復召爲銀夏都巡檢使卒迴性麤率  
不喜文士故事節帥出鎮及來朝便殿宴勞翰林學士  
皆預坐迴白太祖曰陛下宴犒將帥安用此輩預坐乃  
罷之至淳化中復焉

史珪洛陽人周時爲小校太祖累遷馬步軍副都軍頭兼控鶴弓弩大劔都指揮使又加都軍頭領殺州刺史太祖初臨御欲周知外事令珪博訪珪所廉事驗之皆實由是信之後乃漸肆威福民有市官物不當價者珪告其欺罔當寘法列肆無不側目上聞之因詔紀在詔前者一切不問自是珪不復敢言時德州刺史郭貴知邢州國子監丞梁夢昇知德州貴族人親吏之在德州者頗爲姦利夢昇以法繩之貴素與珪善告珪圖去夢昇珪悉記於紙伺便言之一日上因言爾來中外所任皆得其人珪遽探懷中所記以進曰祇如知德州梁夢

昇欺蔑刺史郭貴幾至於死上曰此必刺史所爲不法  
夢昇真清強吏也因以所記紙付中書曰卽以夢昇爲  
左贊善珪以譖不行居常怏怏坐漏洩禁中語出爲光  
州刺史歲饑淮蔡民流入州境珪不待聞卽開倉減價  
以糶所全活甚衆吏民詣闕請植碑頌德太平興國初  
以爲楊楚等九州都巡檢使四年從征太原又從征幽  
州坐失律貶數月召爲右衛將軍領平州刺史督浚惠  
民河民咸便之六年遷隰州刺史知保州靜戎軍上緣  
邊便宜十五事多從焉卒于官珪多智數好以甘言小  
惠取譽故所至不忍其去云



田欽祚汝陰人父令方漢統州團練使與帳下伶人靖  
邊庭妻通邊庭不勝忿會陝西三叛連衡關輔間人情  
大擾邊庭率其徒夜縋入州廨害令方掠郡民乃錄欽  
祚官宋初累功遷至西上閣門使開寶二年又與何繼  
筠破賊于石嶺關領賀州刺史判四方館使朝廷將議  
討江表遣欽祚往覘還奏合旨江南所得寶貨直三千  
萬悉以賜之會興師以功加領汾州防禦使太宗遷引  
進使爲晉州都鈐轄旣而從征太原護前鋒騎兵屯石  
嶺關以扞契丹欽祚性剛戾多忤犯與主帥郭進不協  
進多戰功屢爲所陵遂自縊死欽祚坐罷內職初賊兵

奄至欽祚但閉壁自守旣去又不追所受月奉芻粟多  
販鬻規利爲部下所訴責授睦州團練使遷郢州在郡  
三年人覲見上泣不已以爲銀夏綬宥都巡檢使俄召  
還會征幽州命與郭守文爲排陣使時已被病受詔不  
勝喜一夕卒欽祚性陰狡尤不喜儒人多惡之

王侁字祕權浚儀人父朴周樞密使侁以父任歷東頭  
供奉官開寶中征江南加閣門祇候太平興國初數往  
來西邊多奏便宜上多聽用遷通事舍人四年從征太  
原轉東上閣門副使晉陽平留爲嵐憲巡檢代還遷西  
上閣門使賜錢百萬河西三族首領折遇也叛侁帥師

討擒之以功領蔚州刺史王師北征命爲并州駐泊都  
監又爲雲應等州兵馬都監侁性剛愎以語激副將楊  
業業因力戰死侁坐除名配隸金州事載楊業傳會赦  
移均州團練副使後召還俄卒弟備偃竝進士及第  
論曰王贊輩由門蔭牙校小吏起家率有一策一能可  
採翟守素當用人如積薪之際不競不嫉儒者或媿之  
若趙玘傾趙普丁德裕誣張延通田欽祚凌郭進史珪  
譖梁夢昇王侁逼楊業構田仁朗雖累功伐而所傷實  
多且欽祚與梁迥不喜文儒非徃五代之鄙習耶

劉福

安守忠

孔守正

譚延美

元達

郭密傳累遷李斌附

常思德

尹繼倫

薛超

丁卑趙瑒附

田仁朗

劉謙

劉福下邳人魁岸有膂力初隸周世宗麾下每戰令福率衛士爲先鋒錄淮南功授懷德指揮使宋初遷橫海指揮使以與田紹斌夾擊蜀賊功授虎捷都虞候繼隸曹彬麾下平江南還授指揮使領蔚州刺史從太宗克并汾遷馬步都軍頭武州團練使累遷涼州觀察使判雄州事卒年六十四贈太傅福雖不學而御下有方略爲政簡易人甚德之諸子嘗勸起大第福怒曰我受祿

厚足以饒舍此汝曹既無尺寸功報朝廷豈可爲自安計乎既死上聞其言賜其子白金五千使市第宅

安守忠字信臣晉陽人父審琦爲周節度使封陳王守忠歷衛州刺史宋初爲左衛將軍歷漢州刺史時寇難甫平使車旁午公帑不足守忠出私錢以給用太祖每遣使必戒之曰安守忠在蜀能律已以正汝行見之當效其爲人也開寶初改濮州又副潁州團練使又知遼州太宗時知靈州易州徙夏州西戎犯邊戰無不捷就拜濮州團練使後知滄州改瀛州遷瀛州防禦使初守忠嘗夢一濮字方丈餘及領是郡幾二十年於是始寤

淳化中徙知雄州方與僚佐宴飲有軍校謀變擐甲及  
閤閤者倉卒入白守忠言笑自若徐顧坐客曰此輩酒  
狂爾擒之可也人服其量累遷感德軍節度觀察留後  
知宋州兼制置營田使威德兼著吏民不忍其去卒年  
六十九贈太尉錄其子守忠謹慤淡薄爲治簡靜太祖  
居藩日素相厚善及受禪每優任之守忠處之益謙從  
征太原多與謀略人罕知之者初審琦以愛妾故爲隸  
人所戕故守忠終身不畜妓妾喜佞佛云

孔守正浚儀人歷事漢周至東班承旨宋初補內殿直  
從劉廷翰平蜀還遷驍雄副指揮使征太原隸何繼筠

麾下會契丹遣兵來援晉陽守正大敗之獲其將太宗  
累遷殿前都虞候領容州觀察使一日侍宴北苑上入  
玄武門守正大醉與王榮論邊功于駕前忿爭失儀侍  
臣請以屬吏上弗許翌日俱詣殿廷請罪上曰朕亦大  
醉漫不復省遂釋不問俄命爲定州行營副部署又擢  
高陽關副都部署歷代夏二州部署真宗卽位復徙代  
州咸平初授昌化軍節度觀察留後守正上言四任鴈  
門邊亭父安願徙東北以自效會夏人入寇攻定州行  
營副都部署後移彰德軍留後以疾攻安化軍景德初  
以不任職代卒年六十六贈泰寧軍節度使

譚延美大名人士不逞爲盜周世宗鎮澶淵募置帳下  
卽位以勞遷控鶴軍副指揮使太祖卽位擢至內殿直  
都知太平興國初爲蘄州刺史連徙廬壽濠光州軍巡  
檢使劇賊之爲害者悉就捕六年徙知威虜軍雍熙三  
年舉兵北伐以功擢本州防禦使逾年改亳州出爲鎮  
州鈐轄端拱元年徙知寧遠軍一旦契丹兵抵城下延  
美開門示之不敢入遂引去二年進邕州觀察使判毫  
州兼知代州徙知潞陝涇州咸平中以左領軍衛上將  
軍致仕卒年八十三贈建武軍節度

元達初名守旻雞澤人身長八尺餘負膂力善射任俠



縱酒嘗醉見道旁槐樹拔劍斬之樹立斷私喜曰吾聞  
李將軍射石飲羽今樹爲我斷豈神助歟送徒闕下行  
數舍乃悉縱之追捕至則援弓引滿追者不敢近由是  
亡命山林間爲鄉里患太宗居晉邸達求見隸帳下嘗  
侍射園亭爲更今名卽位累遷媯州刺史繼領本州團  
練使時州郡部送亡命至左右諷殺之達奏赦之以開  
自新之路從之歷北面行營都部署由常山鎮入爲京  
城巡檢卒贈昭化軍節度同時以勇力隸晉邸者又有  
郭密傳思讓李斌密經城人太宗卽位補指揮使擢至  
安州觀察使充靈州兵馬都部署號令嚴肅夏人畏服

卒贈保順軍節度思讓信都人太宗累遷容州觀察使  
知莫州移隴州特命殿中丞林特同判州事以夾輔之  
蓋所爲多不法故也卒贈保順軍節度斌青州人太宗  
累遷萊州洺州團練使勤於政理人服其清慎後拜桂  
州觀察使仍判洺州徙滄州及代吏民不忍其去詔褒  
之

常思德開封人周顯德初應募累遷神衛都虞候太宗  
時數遷擢李順叛蜀命往夔陝招捕調兵掩殺盡殲其  
黨以功真授汝州刺史初曹彬北征不利至涿州左右  
皆潰散獨思德以所部護至易州語人曰旣備戎行當

與主帥同死生若視利害爲去就何面目見君父乎太  
宗嘗聞其言至是陛辭加慰勞焉未幾移慶州副都部  
署屯邠州真宗時改左神武大將軍卒

尹繼倫浚儀人父勳郢州防禦使嘗內舉繼倫可用太  
祖以補殿直權領虎捷指揮太宗再遷洛苑使充北面  
緣邊都巡檢使端拱中威虜軍糧餽不繼契丹潛謀入  
寇上聞遣李繼隆發鎮定兵萬餘護送輜重契丹將于  
越謀知之率精銳邀于路繼倫適領兵巡徼路與寇直  
于越徑趨大軍不顧而去繼倫謂其麾下曰寇蔑視我  
爾彼南出而捷還則乘勝驅我而北不捷亦且洩怒於

我將無遺類矣爲今日計但當卷甲銜枚以躡之彼銳  
氣前趣不虞我之至力戰而勝足以自樹縱死猶不失  
爲忠義豈可泯然而死爲胡地鬼乎衆皆憤激從命俟  
夜人持短兵潛躡其後行數十里至唐州徐河間天未  
明于越去大軍四五里會食詔將戰繼隆方陣于前以  
待繼倫從後急擊殺其將皮室一人皮室者契丹相也  
衆驚潰于越方食失箸爲短兵中其臂創甚乘善馬先  
遁衆隨之大潰相蹂踐死者無數契丹自是不敢窺邊  
平居相戒則曰當避黑面大王以繼倫面黑也以功領  
長州刺史仍兼巡檢後累遷深州團練使領本州駐泊

兵馬部署至道二年分兵五道討李繼遷大將李繼隆  
逗撓不進上怒急召繼倫授靈慶兵馬副都部署欲以  
輔繼隆時繼倫已被病強起受詔上素聞其嗜酒以上  
尊酒賜而遣之至慶州卒年五十上嗟悼賻贈加等遣  
中使護其喪歸葬

薛超平城人乾德初應募爲虎捷卒以伐蜀功補虞候  
遷十將太平興國初四遷至天武指揮使以太原功加  
步軍都軍頭遷神衛軍都校領敘州刺史雍熙三年從  
潘美北征路與契丹遇戰敗之追至寰州裏創乘勝抵  
應州竝下其城事在本紀還加馬步軍都軍頭終天武

指揮使領澄州團練使同時由衛士進者又有丁罕趙  
瑫罕潁州人嘗知霸州河溢壞城壘罕以私錢募築民  
德之歷密州觀察使知威虜軍徙貝州子守德能世其  
家瑫清河人累功至兵馬部署卒贈歸義軍節度使  
田仁朗大名人父武仕晉昭義軍節度使仁朗以父任  
西頭供奉官太祖卽位累功遷至左藏庫使爲中官所  
讒太祖怒立召詰之至殿門命去冠帶仁朗神色不撓  
從容曰臣嘗從破蜀秋毫無犯陛下固知之今主藏禁  
中豈復爲姦利以自汙太祖怒釋止停其職後起爲權  
易使西北邊內侵又選知慶州仁朗大破之其酋長相

率請和璽書褒美太宗時爲西上閤門使歷判四方館  
事李繼遷攻麟州誘殺曹光實遂圍三族砦命仁朗與  
閣門使王侁等發邊兵數千擊之仁朗次綏州奏請益  
兵留月餘俟報會三族砦將折遇也殺監軍使者與繼  
遷合帝聞之大怒亟遣軍器庫使劉文裕代之仁朗不  
知也繼遷乘急攻撫寧砦仁朗喜謂諸將曰撫寧未可  
以旬浹破當留信宿俟其困以大兵臨之分強弩三百  
邀其歸路必成擒矣仁朗部署已定欲示閒暇日縱其  
搏博不恤軍事上知之召赴闕下御史按問獄具當死  
上特貸之責授商州團練副使未幾上知爲王侁等所

構召拜右神武軍大將軍部脩河北東路諸州城池數月而就留知雄州加領潞州刺史時河北用兵大藩多用節將朝議以諸司使有吏幹者佐之以仁朗知定州節度副使事俄召赴闕未聞命卒年六十仁朗性沉厚有謀略頗涉書傳所至有善政死之日人多惜之

劉謙堂邑人曾祖直性純厚里有盜其衣者置不問州將廉知俾人故竊其衣亦不訴理卽召詰前盜衣者俾還之直給云衣乃自以遺少年非竊也州將義之賜以金帛不受而去父仁罕累功至散都頭宋初遷至同州都校謙少不拘小節仁罕資遣行商嘗爲鄉里惡少所



辱謙不勝怒毆殺之亡命京師遂應募補衛士稍遷內  
殿直都知真宗卽位累遷殿前副都指揮使振武軍節  
度先是謙久權殿前都虞候俄擢曹璨正授謙頗形慨  
嘆至是璨副馬軍而升謙領禁衛焉大中祥符初從東  
封禮成進授都指揮使移領保靜軍節度卒贈侍中

論曰夫輸忠奮勇以捍禍亂鎮疆場者武人之職若劉  
福輩累勳膺寵寡過保終詎不難哉考其發跡僅一二  
出將家餘率由草澤或無賴亡命咸能自勵自樹全功  
名易鼎初六之象曰利出否以從貴也其斯之謂歟  
宋史新編卷七十八

宋史新編卷七十九

列傳二十一

明南京戶部主事莆田柯維騏著

劉保勳 滕中正 劉蟠 孔承恭

宋璫 袁廓 樊知古附臧丙

徐休復王延姚坦

劉保勳字修業河南人父處讓晉彰德軍節度使保勳補供奉官習刑名之學頗工詩因獻于宰相桑維翰奇之奏擢爲太常丞歷漢周至工部員外郎宋初拜戶部員外郎遷司封太平興國中歷右諫議大夫知開封府坐事奪奉俄以辛仲甫代之未幾復判大理寺雍熙二

年權御史中丞兼勾當差遣院三年曹彬等征幽州以保勳知幽州行府事子利涉以開封府兵曹督芻粟隨軍常從其父會王師不利濟巨馬河更相蹂躪多死保勳馬陷淖中利涉自後掀出之力不勝人馬相擠壓遂俱死時保勳年六十二贈工部侍郎錄其後優恤之咸平初其妻卒賜錢十萬保勳性純謹不忤物精於吏事不憚繁劇嘗語人曰吾受君命未嘗辭避接同僚未嘗失意居家積貲未嘗至千錢及死聞者咸痛惜之

滕中正字普光青州人周顯德中滑帥向拱奏辟爲掌書記及留守西路又奏署河南府判官檢校戶部員外

卽事太祖太宗歷擢右諫議大夫權御史中丞雍熙元年春大宴上歡甚以虛盞示羣臣宰相言飲酒過度恐失儀上顧謂中正曰今君臣相遇有失者勿彈劾也因是伶官盛言宴會之樂上曰朕樂在時平民安是久乾明節羣臣上壽酒旣三行上目中正曰三爵之飲實惟常禮朕欲與羣臣更舉一卮可乎中正曰陛下聖恩甚厚臣敢不奉詔殿上皆稱萬歲二年以年老辭出知河南府未幾被病罷分司西京淳化初判留司御史臺命其子玄錫權河南司錄以便養未幾卒中正性峻刻連鞠大獄玄錫暨弟玄宴並第進士

劉蟠字士龍渤海人漢乾祐二年第進士解褐益都主簿宋歷遷左諫議大夫卒蟠性清介寡合能攻苦食淡頗事苛刻好設奇詐以售知人主典染作日太祖多臨視之蟠偵車駕至輒衣短後衣芒屨持挺以督役頭蓬不治遽出迎謁太祖以爲勤事賜錢二十萬嘗受詔巡茶淮南部民私販者衆蟠乘羸馬僞稱商人抵民家求市得茶卽擒置于法子錯以蔭爲大理評事復第進士嘗獻幸大學頌真宗嘉賞之

孔承恭字光祖京兆人五世祖戡戡孫迥迥子昌庶昌庶子鼎皆第進士承恭莊子也以蔭歷大理寺丞獻宮

詞託意求進太祖怒引喻非宜免歸後起歷屯田兵部  
二郎中同考校京朝官課第端拱三年詔曰九寺三監  
國之羽儀制度聲名往往而在各有副貳率其司存品  
秩素高職任尤重郎吏遷授斯爲舊章比聞縉紳之流  
頗以臺閣自許目爲散地甚無謂焉朕將振之自我而  
始於是承恭爲太常少卿而宋雄等先爲少卿皆改授  
東宮官承恭俄以疾請老且言早遊嵩少間樂其風土  
願卜居焉授將作監致仕卒承恭少疎縱及長能折節  
自勵嘗䟽請令州縣長吏詢訪耆老求知民間疾苦吏  
治得失皆爲行之尤奉佛多蔬食嘗勸上不殺人又請

於征戰地脩寺及普度僧尼云

宋璫字寶臣華州人乾德中進士及第拔萃登科解褐  
青城簿歷知綿州太宗累遷左諫議大夫歷知陝州淳  
化中三吳歲饑特命知蘇州璫體豐碩素病足州卑濕  
疾益甚或勸謝疾北歸璫曰天子以民病俾我綏撫我  
何可以身病辭旣而太白犯南斗曰斗爲吳分民方飢  
長吏得無咎乎未幾卒年六十一上嗟悼錄其子明遠  
璫性清簡歷官三十年未嘗問家事唯聚書貽子孫且  
曰使不忘本也明遠第進士弟柔遠進士及第  
袁廓劍州人蜀進士及第入中補雙流縣簿累擢友子

右贊善大夫廓夸誕敢大言好詆訐太祖以奇士待之  
太宗遷殿中丞知楚州歸掌京師市征歲中增課數萬  
緡賜緋魚資錢百萬詔公宴別席以寵異之復命知鄆  
州拜監察御史歷度支判官轉本曹郎中判戶部勾院  
廓強項好爭數與判使等較曲直上前聲氣俱厲上每  
優容之然勾稽精密由是部領擁積爲郡吏所訴出知  
溫州就遷鴻臚少卿袁仁甫掌州之關征宗盟之分頗  
相親善一旦不協互有論奏上遣光祿寺丞牛韶往按  
驗韶至並攝繫獄置對上疑廓被誣驛召赴闕廓性剛  
褊詔未至以憤死上悼之驗仁甫所訴無實狀贈廓右



諫議大夫錄其子免韶官削仁甫名籍配隸商州

樊知古字仲師父潛事李景令漢陽石埭二縣因家池  
州知古嘗舉進士不第遂謀北歸迺漁釣采石江上數  
月乘小舟載絲繩以度江之廣狹開寶三年詣闕上書  
言江南可取狀太祖令送學士院試賜本科及第解褐  
舒州軍事推官七年召拜太子右贊善大夫王師征江  
表知古爲鄉導下池州八年遂領州事金陵平拜侍御  
史授江南轉運使豫章洪氏嘗掌昇州權酷逋鐵錢數  
百萬至是知古挾微時常辱於洪責償以快意太宗累  
遷駕部郎中知古本名若水字叔清上嘗聞卿名出何

書對曰唐尚書右丞倪若水亮直臣竊慕之上笑曰可  
改知古蓋倪若水實名若冰云端拱初遷右諫議大夫  
河北東西路轉運使兩路各置轉運副使都轉運使之  
名自知古始二年詔加河北西路招置營田使入朝奏  
事稱旨拜給事中俄爲戶部使頻以職事不治詔書切  
責素與陳恕親善恕時參知政事上言及計司事有乖  
違者恕具以告後因奏事知古遂自解上詰其由曰陳  
恕告臣上怒恕泄禁中語且嫉知古輕悅兩罷之出知  
古知梓州未至改西川轉運使常稱疾鬱鬱不得志淳  
化中青城盜王小波起謂其衆曰吾疾貧富不均今爲

汝輩均之附者至萬餘人陷成都時已詔張雍代知古  
雍未至知古與知府郭載走東川詔復令掌兩川漕運  
知古具伏擅離所部制置無狀上特宥之以本官知均  
州視事旬日憂悸卒

郭載字咸熙浚儀人以蔭歷遷西上閣門使改知成都  
府載在天雄軍屢奏市糴朝臣段獻可馮侃等所市麤  
惡不可給軍食太宗頗疑使覆驗之及報與載奏同獻  
可等皆削官仍令填償及載受代獻可等所市皆支畢  
復有羨數三司判勾馬拯以聞帝召宰相謂曰郭載朕  
向以純誠待之何爲矯誣及此然已委西川俟還別當

詰責於是獻可等悉復官載行至梓州適李順構亂載  
卽日入成都順兵攻城急不能拒守乃與樊知古率僚  
屬斬關出以餘衆隨招安使土繼恩討平之復入成都  
月餘以憂患卒載前在蜀頗能爲民除害再至成都亦  
有所全濟其死也人多惜之

臧丙字夢壽大名人第進士歷右贊善大夫知遼州丙  
素剛果有吏幹會同年生馮汝士知石州與監軍不協  
一夕剗刀於腹而死丙疏汝士非自殺乞按治太宗嘉  
其直累遷右諫議大夫知江陵府卒丙舊名愚字仲回  
旣孤嘗夢其父乃於庭向空指曰老人星見矣因望而

拜既寤私喜以壽星出丙入丁乃改名至是不驗年僅五十三云次子列進士及第

徐休復字廣初濮州人太宗時第進士歷比部郎中樞密直學士知廣州與轉運使王延範不協乃奏延範反狀抵於法遷至給事中知青潞二州初休復上言父母藁葬青社願領是州營丘壠及至青州踰年但務聚財殖貨終不言葬事至潞州數月瘍生於腦比劇若見王延範號呼稱死罪數日卒休復多鄙行無他才能嘗掌誥命弗稱其職云王延範者江陵人形貌奇偉任俠好方術荆南高從誨奏署太子舍人後隨繼冲入覲薦爲

大理寺丞知泰州累遷司門員外郎歷廣南轉運使初  
吉州卜者劉昂謂延範當偏霸一方前戎城主簿田辨  
自言善相亦謂延範大貴卽日當乘四門輦一夕與廣  
州掌務殿直趙延貴等會宿觀天象值太白度經南斗  
延貴謬曰是所謂火星入南斗天子下殿走者也延範  
遂與掌市舶陸坦議欲發兵會坦代歸延範寓書左拾  
遺韋務昇爲隱語偵朝廷機事延範奴視僚屬峻刑多  
怨至是徐休復因懷勇小將張霸告其事馳奏之延範  
與昂辨坦俱斬廣州市務昇延貴等俱抵罪賜霸錢十  
萬宰相宋琪等亦坐罷

姚坦字明白濟陰人開寶中以尚書擢第仕州縣遷至  
著作佐郎太宗詔舉年五十以上通經有文行者備宮  
僚乃以坦爲皇子翊善其後歷考功郎中仍爲益王府  
翊善坦性木強固滯王邸中爲假山成召賓僚置酒共  
觀之坦獨俛首王強使視曰但見血山耳安得假山王  
驚問故坦曰在田舍時見州縣催科捕人父子兄弟鞭  
笞流血此假山皆民租稅所爲非血山而何是時太宗  
亦爲假山聞而毀之王少佚豫坦卽醜詆左右教王托  
疾不朝上憂之召乳母問狀曰姚坦檢束不得自便故  
成疾上怒曰欲朕去正人以自便耶王年少必爾輩之

謀因命粹至後苑杖之王薨改衛尉少卿判吏部南曹  
他日坦因對言及故府諸王之短稱已之敢言旣退上  
謂侍臣曰坦在宮邸不能以正理誨諭事有微失卽從  
而揚之此賣直取名耳後知鄧州移光州卒

論曰古諺有之桃李不言下自成蹊如劉保勳父子誰  
不哀傷也宋瑄貞白盡瘁何有於家臧丙爲友訟冤可  
以觀交情矣滕中正執憲其失也刻劉蟠持廉其失也  
詐孔承恭知止其失也惑郭載惠民其失也罔姚坦通  
經其失也固剛誕之袁廓脩怨之樊知古樂禍之徐休  
復君子謂不得令終也宜哉



陳從信

張平

子從言

王繼升

子昭遠

尹憲

王賓

安忠

陳從信字思齊永城人心計精敏太宗在晉邸令典財用事無大小悉委焉累官右知客押衙及卽位歷左衛將軍樞密都承旨征并汾以爲大內副部署坐廷美事以本官罷明年分使三部以從信爲度支使加右衛大將軍卒贈太尉從信好方術有李八百者自言八百歲從信事之甚謹冀傳其術竟無所得又侯莫陳利用者所爲多不法始因從信推薦人以是少之

張平臨朐人嘗事太宗京邸及秦王廷美領貴州復署

爲親吏遣去徐帥高繼冲署爲鎮將太宗卽位召補右班殿直監市木秦隴上嘉其功遷供奉官監陽平都木務兼造船場改崇儀副使仍領其務凡九年省八十萬緡雍熙四年代王明爲鹽鐵使聞轉運使李安發其陽平姦利憂恚卒贈右千牛衛上將軍平好史傳聚書數千卷在彭門日吏有侮平者後悉被罪配京窯務平召至第爲設酒饌勞之曰公等不幸偶罹斯患慎勿以前爲念給以緡錢未幾遇赦得原時人稱其寬厚次子從吉以蔭至莊宅副使嘗有平賊功云

王繼升冀州人性謹愿事太宗藩邸卽位擢至右神武

軍將軍領本州團練使卒初陳洪進獻地以繼升爲泉州兵馬都監會游洋洞民萬餘叛繼升潛率精騎二百夜擊破之擒其魁送闕下餘黨悉平後與董儼同掌發運司號稱職贈洋州觀察使子昭遠

昭遠形質魁偉色黑繼升名之鐵山有膂力善騎射事太宗晉邸卽位補禁衛數遷擢嘗從征太原及范陽咸有功涪王之遷房陵也諸校以依附被譴獨昭遠無所預帝以爲忠歷殿前都虞候領勤州防禦使命有司治綾錦院爲公署掘地得鐵若山形或言卽鐵山故營又與昭遠幼名同聞者異之帝嘗草書紈扇作古詩賜諸

將意多比諷其賜昭遠尤加賞遇復領沙州觀察使再  
爲并代副都部署後改靈州護諸州芻粟達靈武李繼  
遷不敢犯真宗遷至保靜軍節度使充天雄軍都部署  
知府事移知河陽卒贈太尉諡惠和昭遠頗知書性吝  
嗇所至無善政云

尹憲晉陽人事太宗藩邸卽位擢至供備庫使護夏州  
兵殺戮十四族及誘其渠帥屢詔褒美雍熙初詔就知  
夏州攻破李繼遷之衆于地斤澤歷四方館使知貝州  
移高陽關兵馬鈐轄改知定州與兵馬部署王榮不協  
榮素暴敗憲仆地憲怏怏致疾數日卒

王賓許田人善騎射太宗卽位以舊恩補東頭供奉官  
亳州監軍賓妻妬悍賓不能制時監軍不許挈家從妻  
擅至亳賓具白帝爲召其妻俾衛士粹之杖百以妻忠  
靖卒一夕死累遷右羽林軍大將軍判左金吾兼六軍  
諸衛儀仗司事淳化四年出知揚州兼淮南發運使徙  
爲通許鎮都監卒賓小心謹愿事宣祖太祖太宗殆六  
十年前後賜賚數千萬俱奉釋氏在黎陽日按見古寺  
基卽以奉錢脩之掘地丈餘得數石佛及石碣有賓姓  
名賓以聞詔名寺爲淳化

安忠洛陽人祖叔于仕晉累任方鎮父延韜左清道率

府率忠形質魁岸事太宗藩邸殆二十年卽位累遷東  
上閣門使歷知貝州淳化四年判左金吾街仗復代王  
賓爲左龍武軍大將軍忠泣請諸衛將軍列朝外不得  
近左右願復舊職上笑曰環列之官古官也大將軍三  
品汝終不知朝廷表著之位因從其請復東上閣門使  
充淮南諸州兵馬鈐轄卒

論曰太宗踐阼脩給事藩邸功如柴禹錫數輩皆躡登  
樞要而陳從信張平王繼升尹憲王賓安忠亦歷武階  
膺崇任統之無甚行能徒以謹愿彊幹遭時蒙寵六人  
典兵食率號稱職而政府禹錫等不免史氏之譏是故

食浮于人君子所戒云

張鑑

張觀

索湘

宋太初

盧之翰

鄭文寶

王子興

劉綜

卞袞

許驤

裴莊

牛冕

張適附

樂崇吉

袁逢吉

韓國華

何蒙

慎知禮

子從吉

張鑑字德明以蔭補供奉官鑑本將家能嗜學登進士第歷殿中侍御史太宗命曹彬等討幽州問羣臣方略鑑上䟽極言不可論者以鑑燕人沮議非忠也帝置不問與趙延進同掌左藏延進恃恩踰規鑑廷奏之有旨

罷延進以鑑判三司時三部各置憑由催欠鑑請併爲  
一從之用薦爲江南轉運使建議割瑞州清江吉州新  
淦袁州新喻三縣置臨江軍時以爲便召還擢至樞密  
直學士知通政銀臺封駁司又掌三班王繼恩討蜀寇  
而御軍無政其下恃功暴橫帝以知益州張詠奏命鑑  
與馮守規偕往安撫鑑與詠協議督繼恩輩分捕殘寇  
而鑑等招輯反側事平拜左諫議大夫戶部使會五路  
進兵討西夏令鑑乘傳往環州與李繼隆議護芻糧入  
靈州及還上疏請棄靈州以息飛輓真宗卽位遷至工  
部侍郎出知廣州居二年民請刻石紀其績後移知朗



州溪洞蠻數寇擾鑑以威信諭酋豪皆聽命召還以疾徙知相州有芝草生監牧之室鑑表其祥異以爲河朔弭兵款附之兆云

張觀字仲賓毗陵人江南登進士第歸宋舉進士不第由縣簿歷監察御史充桂陽監使獻所業文賜進士及第會三司言劔外賦輕太宗命觀按行稍增之觀疏言斂怨於民留不遣其後復疏言朝廷急務有六曰邊鄙不寧倉廩未實奢風尚熾逋逃尚多禁令猶密封祀猶闕願聽斷之暇體貌大臣以之揚摧使沃心造膝極意論思爲子孫建不拔之業何必較量金穀剖析毫釐以

有限之光陰役無涯之細務哉上稱善召賜緋魚以爲  
度支判官歲餘遷左司諫改鹽鐵判官又諫罷治佛寺  
不報出爲諸路茶鹽制置副使疏言更茶鹽之制非便  
不合旨改知黃州遷揚州皆有善政召爲三司河東道  
判官有詔計司官屬不得越局言他事觀自以任諫官  
乃上書指陳拾遺補闕之職不奉詔上怒出知道州移  
廣南西路轉運使坐奏事不實被劾獄未具卒觀廣覽  
漢史雅好論事辭理切直有古人風焉

索湘字巨川滄州人開寶六年進士釋褐鄆州司理叅  
軍太宗時歷監察御史詔下東封與劉蟠同知泰山路

轉運事又爲河北轉運副使以能幹聞端拱中自鹽鐵判官復爲河北轉運使遷至虞部郎中選爲將作少監有訟其擅易運絲以自用者降秩知相州時有羣盜聚西山下謀斷澶州河橋入攻磁相州湘擇精銳三百人偵其入境掩擊盡擒之事聞詔復舊官真宗卽位入爲右諫議大夫復充河北轉運使閭日新建議於靜戎威虜兩軍置場鬻茶以資軍用湘言非便遂止又言事者請許權場商旅販易於北界北界商旅許於雄霸州市易資其愁遷庶息邊患詔湘詳議湘言邊民易動難安蓄戎之情宜爲羈制望且仍舊爲便入爲戶部使坐與

王扶交相請託擅易版籍責授將作少監後出知許州徙荆南復爲右諫議大夫知廣州卒

宋太初字永初晉城人太平興國初舉進士解褐大理評事通判戎州歷太常丞通判成都府會詔求直言著可成箴以獻遷至兵部員外郎充鹽鐵副使時陳恕爲以太初有所規畫必咨恕未嘗自用爲功恕甚德之會西鄙有警轉饋艱急改刑部郎中充陝西轉運使坐副使盧之翰違旨貶官明年起祠部郎中知梓州俄復舊秩真宗咸平初拜右諫議大夫知江陵府蠻寇擾動太初以便宜制遏詔獎之歷權御史中丞先是按劾有罪

必豫請朝旨太初以爲失風憲體欲成然後聞上時論  
韙之俄出知杭州以疾求近地得廬州疾久頗昏忘不  
能治大郡連徙汝光二州卒太初性周慎所至有幹職  
譽嘗著簡譚三十八篇序曰禮之中庸伯陽之自然釋  
氏之無爲其歸一也

盧之翰字維周祁州人少篤學登進士第歷吏部員外  
郎陝西轉運使西川安撫轉運使之翰嘗薦李憲爲大  
理丞憲坐贓抵死又副使鄭文寶得罪之翰併前愆左  
授國子博士領使如故尋復舊職會調發芻糧輸靈州  
詔分三道護送命洛苑使白守榮馬紹忠領其事之翰

違旨擅併爲一爲李繼遷所擊大失輜重坐除名貶許  
州司馬復起省郎爲陝西轉運使召拜禮部郎中賜金  
紫復遣之任咸平元年爲京西轉運使坐橫議非使黜  
知歸州三年授廣南西路轉運使就改太常少卿知州  
事之翰無廉稱又與轉運使凌策不協陰發其事徙知  
永州未行卒

鄭文寶字仲賢太平興國八年登進士第歷殿中丞使  
川陝均稅次渝涪聞夔州廣武卒謀亂乃乘舸泛江一  
夕數百里以計平之授陝西轉運副使許便宜從事會  
歲歉活飢民八萬口旣而李順亂蜀秦隴賊趙包聚徒

數千將趨劔閣附之文寶移書蜀郡分兵討襲復其渠  
魁餘黨殲焉遷太常博士加工部員外郎先是諸羌部  
落樹藝殊少仁用池鹽與邊民交易穀麥會餽輒趨靈  
州爲繼遷所鈔文寶建議鹽禁許商人販安邑解縣兩  
池鹽於陝西以濟民食官獲其利而我益困繼遷可不  
戰而屈乃詔自陝以西私市者皆抵死行之數月戎人  
乏食相率寇邊內屬萬餘帳亦叛商人多取他逕出唐  
鄧襄汝間邀善價關隴民無鹽以食境上騷擾上知之  
除其禁朝廷議城古威州訪于文寶文寶言威州在清  
遠軍西北八十里東控五原北固峽口足以襟帶西涼

咽喉靈武城之便且請先建伯魚青岡清遠三城爲頓  
師歸重之地徐議營田積粟實邊以爲經營安西綏復  
河湟之漸詔從其議文寶至賀蘭山下見唐室營田舊  
制建議興復可減歲運之費清遠素無水泉文寶發民  
負水數百里外留屯數千人又募民以榆槐雜樹至者  
厚給其直地爲鹵樹皆立枯西民甚苦其役而城成不  
能守卒爲山水所壞又令寧慶州爲水磴亦爲山水漂  
去旣而文寶復請禁鹽邊民冒法抵罪者甚衆又奏減  
解州鹽價未滿歲虧課二十萬貫下詔切責敗藍山令  
真宗咸平中召授殿中丞掌京南樵貨時慶州發兵護



芻糧詣靈州文寶素知山川險易上言必爲繼遷所敗  
未幾果如其奏轉運使陳緯沒於賊繼遷進陷清遠軍  
文寶時丁內艱服未闋卽命相府召詢其策略文寶因  
獻河西隴右圖敘其地利本末且言靈州可棄時方遣  
大將王超援靈武卽復文寶工部員外郎爲隨軍轉運  
使至環州或言靈州已陷文寶乃易服單騎冒雪間道  
抵清遠故城盡得其實遂奏班師就除本路轉運使䟽  
請再葺清遠軍都部署王漢忠言其生事遂徙河東上  
言管內廣銳兵萬餘難得資糧請徙置近南諸州又欲  
令強壯戶市馬備征役宰相李沆等以爲非使文寶固

執前議因命錢若水詳度所對與沆等同遂罷之遷刑部員外郎賜金紫寇準薦其熟西事復任陝西轉運使上出手劄密戒邊事與僚屬計議勿得過有須索重擾于下後有言其張皐者詔徙京西景德元年契丹犯邊又徙河東文寶安輯所部募鄉兵張邊備又領蕃漢兵赴河北手詔褒諭未幾復涖京西契丹請和文寶陳經久之策上嘉之三年召還未至遇疾擢其子於陵爲大理寺丞知襄城縣以便養後改兵部員外郎歸襄城別墅卒文寶好談方略以功名爲已任久在西邊參預兵計心有餘而識不足又不護細行所延薦屬吏至多未

嘗擇也能爲詩善篆書工鼓琴有集二十卷又撰談苑  
二十卷江表志三卷

王子興字希孟密州莒人太平興國八年舉進士解褐  
北海主簿歷任江淮兩浙制置茶鹽遷至太常博士真  
宗卽位遷殿中侍御史因入對與三司論列利害以子  
輿爲長轉度支員外郎子興以每事上計司移報稽滯  
求兼省職乃命爲鹽鐵判官仍領制置增歲課五十餘  
萬貫咸平三年就命兼充淮南轉運使子興精吏事久  
掌茶鹽漕運裁量經制公私便之文牒紛委曾無凝滯  
明年表求代詔許自擇子興以下袞劉師道名聞卽命

袞與師道爲轉運使子興拜右諫議大夫戶部使卒

劉綜字居正虞鄉人少依外兄通遠軍使董遵誨遵誨嘗遣子馬太祖嘉其敏辨將授三班之職綜自陳素習詞業願應科舉雍熙二年登進士第解褐邛州軍事推官歷知建安軍遷太常丞咸平初判三司都理欠憑由司出爲河北轉運副使夏人擾西邊環慶大屯士馬詔徙綜陝西轉運副使轉太常博士時靈州孤危獻言者或請棄之綜上言靈州民淳土沃爲西陲巨屏所宜固守以爲扞蔽然後於浦洛河建軍城屯兵積糧爲之應援此暫勞永佚之勢也俄充轉運使四年又獻議於鎮

戎軍置屯田務又錄唐安國鎮制置城壕鎮戎古記石  
本以進詔從其請累遷起居舍人再爲河北轉運使時  
兩河用兵邊事煩急轉漕之任尤所倚辦綜繼領其職  
號爲詳練至是眷矚甚厚警急之際輒資其奏處景德  
三年召拜戶部員外郎樞密直學士勾當三班院四年  
擢知孟州事未幾召還復出知并州以政績聞州民乞  
留優詔嘉獎歸朝知審官院改吏禮二部郎中充職兼  
知通進銀臺封駁司大中祥符中館伴契丹使因作大  
雪歌以獻俄權知開封府以末疾命知廬州授右諫議  
大夫卒綜強敏有吏材所至抑挫豪右振舉文法然尚

氣好勝不爲物論所許

卞袞字垂象成都人父震工爲詩舉蜀進士渝州刺史  
南光海辟爲判官蜀平仍舊職會賊杜承褒率衆圍城  
震中流矢州兵宵遁賊遂入據城以僞官厚賄誘震震  
斬其使伏兵擊其黨類與刺史陳文襲分部餘卒夾攻  
之賊遂平震以功得贖以虢州錄事參軍卒袞太宗時  
登進士第累遷著作佐郎通判宣州淳化中上命采庶  
僚中廉幹者旌異之袞預焉歷刑部員外郎充鹽鐵副  
使卒袞明敏有吏幹然性掎克嚴峻專事捶楚至有大  
蟲之號真宗嘗謂近臣曰大凡督察部下糾逖行違非

有大故所宜矜恕官吏自當畏威懷惠不敢貳過公家之事亦無不濟乃知爲吏之方適中爲善也

許驤字允升世家薊州當後唐之季父唐白其父信曰國政廢弛必乘釁不卽去且爲所虜信以資產富殖不樂他徙唐遂潛贖百金而南未幾晉祖革命果以燕薊賂契丹唐歸路遂絕上居睢陽娶李氏女生驤風骨秀異郡人戚同文以經術聚徒唐攜驤詣門下從學驤十三能屬文善詞賦唐不識字而聲家產爲驤交當時秀彥太平興國初請貢部與呂蒙正齊名太宗雅知之廷試擢甲科歷官右補闕出知諸州及諸路轉運使歸

知審官院積遷至御史中丞眞宗卽位改工部侍郎屢  
求小郡養疾命知單州卒年五十七贈工部尚書驥無  
他才略人稱爲儒厚長者

裴莊字端已閬中人蜀明經第其弟歸宋歷高陵主簿本  
府召權司理掾轉運使雷德驤以威望自任嘗巡按至  
境官屬皆出迎候莊獨視事本局徐謁道周德驤稱其  
有守歷通判澶州遷太子中允端拱初潘美鎮真定又  
辟爲通判時契丹掠趙深邊將無功莊上書以爲周世  
宗誅樊愛能何徽二將遂取淮南克巴蜀願陛下申明  
紀律無使玩寇淳化三年召訪邊事稱旨拜監察御史



三司鹽鐵判官上疏請給兩省官諫紙會劉式建議請廢緣江權務莊力言其非便累遷祠部郎中真宗卽位遷度支歷河北轉運使時傅潛統大軍駐定州北莊屢條奏其乏謀略恐失機會王顯掌樞密顯與潛俱起攀附頗庇之莊奏至多不報徙知越州俄傅潛得罪莊因上言顯潛皆非材致誤邊事請行嚴誅以肅羣議未幾徙知宣州會詔百辟上封直言莊條列四事改司封郎中遷至光祿卿卒年八十一莊有吏幹好爲規畫慷慨敢言太宗獎其忠讜多聽納然無清操寡學術嘗建議置廣聽院西垣學士聞者嗤之晚年退居製棺槨自隨

喜接賓客終日無倦子與咸平二年進士

牛冕字君儀彭城人太平興國三年進士歷左正言福建轉運使加左司諫建議廢邵武軍歸化金坑土人便之至道初連拜兼侍御史知雜事真宗時選知益州擢至右諫議大夫兩川戍卒乘符昭壽之虐嘯集爲亂冕與轉運使張適委城遁坐削籍流遠州歷海郛二州別駕淮南節度副使後帝頗念之起知漣水軍俄復祠部員外郎卒張適者太平興國五年進士任藩郡有治績以廉敏稱爲水部員外郎知鄆州獲對太宗喜其詞氣俊邁賜緋魚旋改京東轉運副使加直集賢院一日三

被寵渥時人榮之徙西川轉運使坐貶起爲彰信軍節度副使知淮陽軍卒

樂崇吉字世昌封丘人少爲吏部令史上書言事調補臨淄主簿會令坐贓敗卽命崇吉代之復以書判優等改舒州團練判官未行留爲中書刑房堂後官明習文法清白勤事累擢江南轉運使歷知洪州濠州遷至衛尉少卿以將作監致仕卒

袁逢吉字延之鄆陵人開寶八年擢三傳第釋褐清江尉歷西京轉運使遷至水部郎中宰相呂蒙正薦其有經術宜任學官會蜀叛方藉資授西川轉運使徙荆

湖北路坐乏糧餉罷職知夔州會遣使川陝採訪因條  
上知州通判有治迹者七人逢吉預焉太宗賜詔褒諭  
歷知汝州至鴻臚少卿卒逢吉性脩謹練達時務初鄆  
州牧馬草地侵民田數百頃牒訴連上凡五遣使按視  
不決逢吉受命往悉還所侵田民咸德之

韓國華字光弼安陽人太平興國二年進士歷監察御  
史雍熙中假太常少卿使高麗時太宗將北征以高麗  
接遼境屢爲其所侵命齎詔諭之且令發兵西會旣至  
其俗頗犷鷙恃險未卽奉詔國華移檄諭以朝廷威德  
宜亟守臣節否則天兵東下無以逃責於是俯伏聽命

累遷左司諫充鹽鐵判官淳化二年朝廷疑契丹請和  
非實遣國華使河朔察之既至盡得其詐以聞每歲後  
苑賞花三館學士皆得預國華與潘太初因對自言任  
兩省清官兼計司職不得侍曲宴願兼館職卽命竝直  
昭文館前此未有也累官太常少卿知泉州遷右諫議  
大夫卒國華偉儀觀性純直有時譽子琚琰琦竝進士  
及第琦自有傳

何蒙字叔昭洪州人李煜時舉進士不第獻書言事署  
錄事參軍入宋歷遂寧令太宗征契丹還作詩以獻召  
見賞歎授右贊善大夫三遷至水部員外郎通判廬州

戶部使上其治狀詔賚緡錢稍遷司門巡撫使薦其材  
敏召對訪江淮茶法條奏利害稱旨賜緡魚及錢十萬  
後二日復對又上淮南酒榷便宜特改庫部後賜錢二  
十萬因命至淮右提總其事自是歲有羨利使還知溫  
州坐失舉削一官真宗卽位復前資出知梧州改水部  
郎中上所著兵機要類十卷累轉庫部加太府少卿歷  
知濠州上表謝事授光祿少卿致仕卒

慎知禮衢州人父溫其有詞學仕錢俶終元帥府判官  
知禮爲掌書記宋初介俶子惟濟入覲歸署營田副使  
後從俶歸朝授鴻臚卿歷知陳州興元府母年八十餘

居宛丘懇求歸養退處十年縉紳稱其孝母服除表請  
納祿以工部侍郎致仕卒知禮自幼至老歲讀五經周  
而後止每開卷必正衣冠危坐子從吉

從吉字慶之錢俶壻也爲元帥府長史歸宋歷右庶子  
遷詹事自歸朝居散秩幾三十年頗以文酒自娛景德  
初上言求領事務判刑部頗留意法律條上便宜後改  
官糾察在京刑獄又判吏部銓又權知開封府擢至給  
事中眞宗召戒之曰京府浩穰太速則誤太緩則滯惟  
須酌中耳從吉不受請屬才數月有咸平縣民張斌妻  
盧氏訴姪質詬悖質賄于吏從吉予大理寺丞銳爲請

于縣宰質洎盧迭爲訟縣聞於府從吉命戶曹參軍呂  
楷推問盧之從叔號略尉昭一賂楷楷久不決盧兄文  
質又賂從吉長子大理寺丞鈞鈞白從吉而隱其所受  
盧詣府列訴卽下其事右軍巡院昭一兄澄嘗以手書  
達錢惟演云寄語從吉事逮鈞銳請緩之從吉密請付  
御史臺鞠之獄成從吉坐勒停惟演罷翰林學士楷鈞  
免官配隸衡郢州銳文質皆削一官澄昭一竝決杖配  
隸又高清者景德中舉進士頗恃姻援驕縱知太康縣  
民有詣府訴家產者清納其賄時已罷任卽逃居他所  
銳嘗就清貸白金七十兩清以賄賂將敗求以爲助時



方鞠盧氏欲從吉請對發其事欲以自解清杖脊黔面  
配沙門島銳與從吉再削官從吉後起衛尉卿判登聞  
鼓院以光祿卿致仕卒從吉喜爲詩時有警語兼工醫  
術千孫第進士升朝曳朱紱者數人家故富猶嗜財治  
生至鬻棺槨於市人咸鄙之又善爲饌具分遺權要晚  
年進趨彌篤故取敗云

論曰提身之謂行應務之謂才中人兼者鮮矣長厚莫  
如許驤純直莫如韓國華勤潔莫如樂崇吉篤孝勇退  
莫如慎知禮其行無議已撫輯莫如張鑑建白莫如張  
觀幹敏莫如宋太初王子興練達莫如索湘何蒙袁逢

吉其才莫尚已鄭文寶有志而寡識劉綜舉職而尚氣  
下衮奉法而少恩裴莊敢言而不學斯各有所短也若  
庸之翰乏廉操牛冕棄城守才又何稱焉

宋史新編卷七十九